

Peter Boyd di Carbon War Room "Aruba tin skill and will"

Aruba ta brinda oportunidad na empresarionan

DELFT/ORANJESTAD – Tur condicion pa haci di Aruba e prome 'smart island community' ta presente eynan. Esaki ta loke José María Figueres, presidente di Carbon War Room a bisa su audiencia durante un encuentro tocante 'Sustainable Aruba: Investment Opportunities' na Delft.

E encuentro aki cu a tuma lugá na Delft a wordo organisa dor di e compania Blue-riise y Carbon War Room pa

monstra empresarionan Hulandes riba e posibilidad di por hunga un rol den realisacion di e meta di Aruba pa tin un economia completamente duradero na 2020. "Nos ta un organisacion cu ta 100% non-profit cu ta ocupa su mes cu 'profit'. Esaki dor di haci di durabilidad un oportunidad di negoshi. Tin hopi placa pa gana cu durabilidad". Como ex presidente di Costa Rica, Figueres ta mira cu asombro con politiconan ta reacciona

riba e crisis. "Ta parce cu nan kier bay bek den tempo en bes di enfoca riba futuro. Pero aki no tin otro escogencia: petroleo fosil ta bira solamente mas caro y ta caba un dia". Carbon War Room a scoge pa yuda Aruba den logra su meta pa convence mundo cu cosnan por ta otro. E organisacion cu a wordo funda door di Sir Richard Branson kier para tur uzo di petroleo fosil cu ta dañino y ta mira den Aruba un 'showcase' pa demostra cu esaki no ta un ilusion. "Tur condicion ta presente na Aruba. Un Prome Minister cu vision, un gabinete decisivo y sosten di e pueblo.

Na Europa e economia ta bahando y desempleo ta subiendo. Den Latino-America e economia ta crece y desempleo ta bahando. E match perfecto pa haci negoshi. Aruba ta situa na 35 kilometer dilanti costa di Latino-America, un mercado di 500 miyon consumidor cu gobiernonan cu tin masha gana di haya e experticio y experiencia di Europa. Esnan cu kier probacha



di esey ta uza Aruba como stepping stone. Tur loke bo mester tin pa ta exitoso den paisnan manera Colombia, Panama y Brazil tin na Aruba. TNO a tuma e paso ey caba, asina ta cu boso no por ta e prome mas, pero si ta den e promenan. Aruba ta bay bira un lider den mundo. Despues di Aruba ta sigui otro islanan, despues ciudadnan y paisnan. 'Come aboard and join us on this exciting journey'. Esaki ta e momento pa dicidi pa participa. Wak pa bo t'ey na e conferencia 'Europe meets

the Americas' na Aruba, asina Figueres den forma apasiona a bisa. E ultimo palabra na Delft tabata pa Peter Boyd, Chief Operational Officer di Carbon War Room. "Skill and will ta presente na Aruba. Tin un vision riba durabilidad y tin liderazgo. Aruba ta bira un modelo di demostracion cu ta bay inspira mundo. Esaki ta brinda oportunidadnan grandi pa empresarionan". Riba e combinacion di foto por tira un bista riba e encuentro. Fotonan cortesía Nico van der Ven. □

